



Trotzchöpf 1983

CLIQUE LIESCHTEL

Sujet 1998: Mir sy im Komete-Fieber! S Gschiss ume Hale-Bopp und anderi Lüüchte!

Si chömme tief usem All, uf unerforschte Bahne;
Angscht und Schrecke hei si verbreitet zur Zyt vo eusne Ahne.
Chuum hei d Aschtronomie e Komet am Himmel entdeckt,
hei si bym Volk Angscht vorem Böse und Unheil geweckt.
Das isch hüt gottseidank verby und umme,
s Volk loht sich nümme so lycht verchaufe als die Dumme.

Sone Komet mit sym lange Schweif hettis im letschte Jahr beehrt;
Vo däm Bolle Dräck goht e magischi Chraft us, das hei mir glehrt.
Usgrüschtet mit Fäldstächer, Färrohr und Proviant sy mir loszoge in d Nacht;
Vor luter luege und stune sy mir nümme ins Näscht und hei duregmacht.

Bym beobachte vom Hale-Bopp hei mir glehrt
as d Komete am Böse schuld sy, das isch verchehrt.

Au z Lieschtel gits Sache wo nit zum Beschte laufe;
So seit s Oberkänguruh: ohni Gälder chönne mir kei Mehrzwäckhalle chaufe!
Es will im Gegesatz zum Parlamänt die tolli Halle nit so gschwind;
Dass dä Bou für Lieschtel die letschti Chance wär, will ihm nit in Grind.
So verschwinde die tolle Plän vo der Urne direkt ins Fүүr,
doch dä Abschtimmigskampf chunnt die IGL-Chrämer tüür.
So hei die Bursche bald kei Gäld meh in der Kasse;
D Lämpfli für d Wiehnachtsbelüüchtig müesse so verblasse.
Mir sy scho no froh, dass gnüegend Geld für d Wiehnachtsbelüüchtig isch ynecho;
Aber wieso dass Lieschtel die türschti Birlilagerig het, chönne mir nit ganz verstoh.

Au der alti Ängel lit nach hundert Jahr lahm und finanziell am Bode;
Dr Hartmaa Ruedi chasch mit synere Gschäftspolitik gar nit lobe.
Dass der Ängel no lang nit fliege cha lit nit an de Komete,
sondern an de Lieschtler Chöpf und der Kasse ohni Monete.

Um dä alti Obelisk und dä schlammig Brunne macht sich dr Stutz Sorgä;
Er seit die beide Dänkmöler sy wärtvoll und müesse erhalte blybe au für morgä.
Doch dr Lüthi, d Halleabstimmigskampfverlierer und Kon-sortie sy anderer Meinig;
Das Burädänkmol stoht eusne Plän im Wäg, es muss äwäg, do sy si sich einig.

Syt as d Gebühre für der Abfallsack ständig stiege,
deuje mir nümme soviel Dräck an Strosserand bygä.
Die Märkli fürs Altöl, Komposcht und Metall würde eus in Ruin yne trybe;
Doch hei miris immer gfrogt, wo isch die Mängi plötzlic blybe?
Wo mir im Summer ins Stedtli sy, hei mir erfahre müesse;
Do het öper Abfall entsorgt, ohne dass Stapo het chönne büesse.
Doch seisch däm Abfall hüt no Abfall, hesch kei Dunsch;.
Die Stange, Brätter, Altyse und Fätze si hütte Kunsch.

Wie allewyl isch am Fasnachtszischdig d Latärne-Usstellig im Alte Züüghuus vom
zwei zmittag bis am nüni zobe!